

U PB 30-11 00193 BA498

Bah

UMNO - Mahathir (PAS)

KUALA, LUMPUR, 30 Nov (Bernama) — Kerajaan Persekutuan tidak akan berhempas pulas untuk menolong kerajaan PAS di Kelantan kerana ia mestilah menunaikan segala janji yang dibuatnya dalam pilihan raya lepas, kata Datuk Seri Dr Mahathir Mohamad.

+Kita tahu sebarang bantuan yang diberi oleh kita akan digunakan oleh PAS untuk membuktikan bahawa tidak ada ruginya memilih PAS sebagai kerajaan,+ katanya ketika berucap merasmikan Perhimpunan Agung UMNO di Dewan Merdeka, Pusat Dagangan Dunia Putra di sini hari ini.

Perdana Menteri berkata semasa pilihan raya pun bantuan yang diberikan oleh kerajaan persekutuan dikatakan oleh pegawai-pegawai kerajaan negeri, yang memihak kepada parti-parti lawan, sebagai bantuan oleh mereka.

+Mereka dapat meyakinkan rakyat bahawa tanpa bantuan kerajaan persekutuan pun tidak menjadi masalah kerana mereka boleh mendapat bantuan wang daripada Presiden Parti 46,+ katanya dalam ucapan yang tegas itu.

+Dakwaan bahawa Brunei akan membantu Kerajaan Kelantan adalah tidak benar kerana Duli Yang Maha Mulia Sultan Brunei sendiri telah menafikan akan memberi apa-apa bantuan,+ kata Datuk Seri Dr Mahathir, yang menghadap baginda di Istana Shariff Ali di sini beberapa hari lepas. — Lagi.

♥30/11/10-41MST

U PB 30-11 00211 BA501

Bah

UMNO - Mahathir (PAS) 2 Kuala Lumpur

Beliau berkata usaha Menteri Besar Kelantan Haji Nik Abdul Aziz Nik Mat untuk berbaik-baik tidak bermakna kerana pihak lain dalam PAS dan +Harakah+, akhbar parti itu, tidak berhenti-henti mengecam Barisan Nasional, UMNO dan kerajaan persekutuan.

+Justeru itu kerajaan persekutuan tidak akan berusaha menjayakan kerajaan PAS,+ kata Datuk Seri Dr Mahathir, yang juga Presiden UMNO, kepada 1,500 anggota perwakilan.

Beribu-ribu pemerhati turut menyaksikan majlis pembukaan itu menerusi televisyen litar tertutup yang diletakkan di setiap penjuru dan aras di pusat itu.

Datuk Seri Dr Mahathir berkata UMNO rela menerima kekalahan di Kelantan dalam pilihan raya lepas kerana ia kehendak majoriti rakyat negeri itu.

Tetapi beliau berharap rakyat akan lebih mengetahui janji-janji kosong PAS dan menolaknya jika parti itu gagal membahagiakan negeri itu dengan penduduk yang maju jaya.

+Kita amat sedih dengan cara-cara yang mereka gunakan untuk memancing undi. Janji yang bukan-bukan dibuat kepada pengundi, janji yang tidak mungkin mereka tunaikan,+ katanya.

+Kita tidak dapat meneka sama ada kemenangan mereka adalah kerana malaikat bersama mereka seperti didakwa oleh mereka atau ia adalah satu ujian supaya rakyat dapat melihat bagaimana mereka telah ditipu. Sama-samalah kita saksikan,+ katanya. — Lagi.

♥30/11/11-00MST

CNS3906

R PB 30-11 00163 BA517

Bah

Mahathir - PAS 3 Kuala Lumpur

Datuk Seri Dr Mahathir mengakui ada perkara yang diletak di bawah kuasa kerajaan persekutuan tetapi janji-janji yang dibuat oleh PAS berkenaan dengan cukai-cukai dan lesen majlis tempatan boleh ditunaikan oleh kerajaan negeri itu.

+Kita ingin melihat mereka menghapuskan cukai-cukai ini. Janganlah memberi alasan bahawa janji yang dibuat adalah oleh Angkatan Perpaduan Ummah (APU) sementara kerajaan Kelantan adalah kerajaan PAS,+ katanya yang kerap kali mendapat tepukan sepanjang ucapan itu.

PAS adalah anggota APU dan janji APU adalah juga janji PAS, katanya dan menambah PAS juga terikat secara langsung dan tidak langsung dengan janji-janji Gagasan Rakyat.

+Sebagai parti politik yang mendakwa berpegang kuat kepada ajaran Islam, PAS mestilah menunaikan janji-janjinya,+ katanya.

Beliau berkata kerajaan persekutuan tidak bercadang menghalang kerajaan PAS di Kelantan mengambil tindakan dalam beberapa perkara yang terletak di bawah bidang kuasa kerajaan persekutuan, jika perkara-perkara itu tidak tertakluk kepada undang-undang tertentu. -- Lagi.

♥30/11/12-21MST

R PB 30-11 00184 BA518

Bah

Mahathir - PAS 4 Kuala Lumpur

+Umpamanya jika PAS berpendapat bahawa sekolah-sekolah kerajaan adalah sekolah sekular, kanak-kanak di Kelantan boleh pergi ke sekolah yang tidak sekular yang didirikan oleh kerajaan PAS,+ katanya.

+Lesen-lesen untuk tempat berniaga bagi barang-barang yang PAS anggap haram boleh ditarik balik oleh PAS termasuklah institusi-institusi kewangan tertentu dan pajak gadai,+ katanya.

Datuk Seri Dr Mahathir juga berkata wanita PAS tidak ada hak yang sama untuk bekerja dengan lelaki di mana-mana jua.

+Jika salah mereka bekerja pada malam hari di luar rumah bersama-sama orang lelaki, salah jugalah di siang hari,+ katanya. Kerajaan Kelantan baru-baru ini mencadangkan untuk melarang kaum wanita di negeri itu bekerja pada malam hari.

Beliau juga mempersoalkan tentang janji Yang Dipertua PAS Haji Fadzil Noor untuk bekerjasama dengan wakil DAP dalam Dewan Undangan Negeri Kedah selepas memenangi pilihan raya sedangkan parti itu mendakwa bekerjasama dengan orang kafir akan menjadikan orang Islam, kafir.

+Apa salahnya jika bekerjasama dengan UMNO atau apakah hanya sanggup bekerjasama dengan kerajaan persekutuan apabila terdesak sahaja?+ tanya beliau. -- Bernama.

♥30/11/12-23MST